

Saturday, November 15, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

PLAYGROUND

Aizawl Smart City Ltd., Urban Development & Poverty Alleviation Department hmalaknaa din Chite Veng Playground chu UD&PA Minister Pu K. Sapdanga’n nimin khan a hawng.

Hawнна hun hi Chite Playground, Chite veng-ah buatsaih a ni a, Field Management Committee leh khawtlang hruaitute he hunah hian an tel a ni. UD&PA Minister chuan khawtlang hruaitute leh sports department te nena thawh hona a that avanga he khelmual pawh din a nih thu sawiin thawh hona tha awm zel se a duh thu a sawi a. Khawpui hmasawнна chu UD&PA department-te mawhphurhna a nih anga theihtawp chhuaha hma lak zel a nih tur thu sawiin Mizote tan sports chu eizawнна tlak a ni tih atakin a lang chho zel niin a sawi a, Mizo infiammite'n ram pum huap chawimawina an dawng thinte hi hmasawнна ruhrel dintu department tan pawh hlawhtlinna ropui tak a ni, a ti a, nasa lehzuala sports infrastructure-te pawh tih hmasawn zel tum a nih thu a sawi bawk.

Playground hawнна inkhawmah hian Pu CC. Lalchhuangkima, Chief Executive Officer, Aizawl Smart City Ltd. hnen atangin Technical Report ngaihthlak a ni a. Report-a tarlan a nih danin Project cost hi Vbc 9.85 niin he hna thawk tur hian North East Consultancy Services (NECS) te rawih an ni a, hna hi November 25, 2022 ah thawh tan niin, nikum August 27 khan zawh a ni.

Chite Veng Playground enkawl tur hian YMA, Local Council, MUP, MHIP aiawhte telna 'Field Management committee' din niin he playground atanga sum hmuhte chu veng chhungin za zela 70 changin za zela 30 chu sawrkarah an chhunglut thin a ni dawn a ni.



GASTROENTERITIS

Kawtha-lo hri inkaidarh awlsam tak a len avangin Siaha leh Lawngtlai a he hri lenna hnaih Myanmar ramri khar a ni a, mi 9-in an thipui tawh.

Lawngtlai leh Siaha bawrhsapte chuan hri leng darh zel tur venna atan ramri a inkalpawh khapna thupek an chhuah a. 'Tuihri' ti a sawi, hriselna lam mithiamte'n 'gastroenteritis' an tih hri leng avang hian Lawngtlai district-a Kakichhuahah hian nizanah mi pakhat a thih belh leh avangin he khua a kawthalo/tuihri natna ni a rinhlelh vanga thi chu 6 an tling tawh a. Siaha district-ah 3 thi tawhin an vaiin mi 9 an thi tawh a ni. Lawngtlai district-ah hian Kakichhuah khua-ah November ni 4 atang khan mi 5 an thi tawh a, thite hi Khumi hnam vek an ni a hriat a ni. Lawngtlai district-a Hruitezawl khua-ah pawh tuihri hi a leng mek ni a hriat a ni a, thuchiang nghah mek a ni. Siaha district-ah chuan Lomasu leh Lodaw khua-ah he hri hi a leng mek a. Lodaw khua-ah mi 3 an thi tawh a. Lomasu khuaah hian November ni 5-ah damlo an awm tan a, Lodaw khuaah November ni 11-ah he hri leng kai hi hmuhchhuah a ni bawk a. Lomasu khuaah he hri kai hi 14 awmin, Lodaw khuaah mi 4-in an kai bawk a ni.

He tih lai hian Siaha leh Lawngtlai district ramri Chin state chhim lama Paletwa bial chhunga Sinletwa (Sin Let Wah) khua-ah kawthalo natna vei hi mi

300 chuang an awm tih report a awm a. Arakan hel pawl, helai bial awptu United League of Arakan (ULA) leh an ralthuam keng pawl Arakan Army te chuan damlo na zualte an enkawl mek niin an sawi a. Siaha leh Lawngtlai district a tuihri kaite pawh hi Myanmar lam atanga lo lutte kaichhawn ni a hriat a ni a.

Lawngtlai bawrhsap Pu Donny Lalruatsanga chuan vawiin khan chanchinbumite kawmin hrileng vangin Sorkar chuan theihtawp a chhuah tih sawiin, Hri chu Myanmar ram chhung, Salachhuah atanga rawn lut ni a an hriat thute, tun dinhmun ah Kakichhuah leh Hruitezawl chu 'Containment area' a puan a nih tawh thu a sawi a, Sr. CMO kaihraina hnuaiah Medical Team- ten an vil reng bakah, World Health Organisation (WHO) Medical Team leh Doctor without Borders- te pawh Hri lenna hmunah hian lutin an thutchilh tawh a ti a, state sorkar a hotu lian zawkah pawh an dinhmun a thlen tawh thu Bawrhsap chuan a sawilang tel bawk.

Sr. CMO Dr. Lalmuanawma Jongte chuan hrileng mek chu zir chian mek a ni a ti a. ZMC&H ah Sample an thawm result pawh hriat theih thuai an beisei thu a sawi a, Kakichhuah khua a thi zawng zawng hi mi paruk- raltlan 3 leh khawtual mi 3 an awm tawh tih a sawi. Sr. CMO kaihraina hnuaiah 'Rapid Response Team' din niin, damlote ngun taka enkawl an nih bakah hri leng darh lo tura chak taka hmalak a nih thu a sawi a. Hri lenna hmuna mipuite chu damdawi lam thiamten tihtur leh tihlohtur an sawite tha taka zawm tura a duh thu leh, an hriattheih chinah Hrileng mek chu boruaka inkaichhawn theih chi ni lova an ngaih thu a sawi.



TRAFFIC MISHAP

Kumin January thla atanga October thla chhungin Mizoramah lirtheia chetsualna lian tham vawi 91 a thleng a, mi 77 in nunna an chan tawh.

Traffic Police thuneitute hnen atanga Akashvani News Aizawl thu dawn danin, lirtheia chetsualna an chhinchhiah vawi 91 zinga 68-ah te chuan thihna a thleng a, mi 77-in nunna chanin, midang 27 na takin an hliam a, mi 19 na vak lovin an hliam thung a. Kumin chhungin March thla kha lirtheia chetsualna liantham thlen tam ber thla niin, vawi 16 thlengah mi 16 an thi a, June thla ah thleng tlem berin lirtheia chetsualna liantham vawi 4 thlengah mi 3 in nunna an chan a ni.

Aizawl Municipal corporation huamchhung bikah kumin hian lirtheia chetsualna lian tham vawi 26 thlengah mi 13 in nunna an chan a ni.

Traffic hotute chuan Mizorama lirthei chetsualna thleng tam zawk chu a khalhtu fimkhur loh vang a ni a, a khalhtu ruih vang leh lirthei khawl lam fel lo vang te chu zaa 10 vel ve ve a ni an ti a. Mizoram chu tlang ram a nih bakah kawng kawi tam tak a awm avangin mipuite chu fimkhur taka lirthei khalh turin an chah a, lirthei te tha taka enkawl thin tur leh vanduaiana tawh palh pawha dan anga thiam an chan theihna turin lirthei document felfai taka enkawl turin an chah bawk a ni.



MISSING EXOTIC BIRD

October ni 29 atanga Aizawl Zoological Park atanga vaki chi khat, Pesquet's Parrot bo chu vawiin thlengin hmuh a la ni lo.

Akashvani News Aizawl zawhna chhangin, Deputy Conservator of Forests Aizawl Wildlife Division, Aizawl Zoological Park Director ni bawk Pi Margaret Lalramchhani chuan sava bo tirh atang khan thenawm state Assam leh Meghalaya bakah Wildlife Crime Control Bureau thuneitute puihna nen ngawrh taka an zawn bakah tunhnai hian CID in a chhui hna an thawhpui bawk a ti a, hetihlai hian sava bo chungchangah thuthar a la awm rih lo tih a sawi a ni.

Kum 2006 atanga din Aizawl Zoological Park-ah hian ramsa 300 chuang an awm mek a, kum 2022 atang khan ramsa engemawzat chu bo tawhin, tun thlengin hmuh let a la awm lo a ni.

